

OILA

PULETINI A'OGA

24 Fepuari 2014 Vol 4 Issue 3

Imeli feso'ota'i: evaleon@xtra.co.nz

E le fa'atauina~Not for Sale

e fa'asoa fa'amatalaga mo a'oga i le gagana Samoa

Laufatu a Samoa Tala: E le galo Mulivai <i>Saili Sala Lemalu</i>	Ripoti o le Vaiaso Faaauau le tautua a le Ulimasao mo a'oga	Tala faasolopito O le Mau a Taisi
		

Oototoga talamua o le vaiaso

Ulufale taifau i potua'oga

E silia i se 10 ni a'oga i Kalaiesetete na latou faaagaina le tautua a taifau sosogi i le tausaga na se'i mavae. O le tali lea a ni a'oga i le taulaga i le faafitauli o fualaau faasaina poo tapaa faafoliga (synthetic) e avatu e tamaiti i totonu o a'oga. Ua a'oa'oina taifau e su'e totonu o loka (locker) ma potua'oga ae le o tino o tamaiti.



E le talia e le malo le tia'i a'oga

O le momoliga o se ulugalii i le tulafono ona o le tia'i a'oga o la laua tama o se lapataiga malosi lea i matua o le le tuuavanoa o le malo i lea tulaga. E 47 aso mai le 111 na le a'oga ai le teine ma molia ai e le a'oga i le CYF. O loo finau malosi le tina sa ma'i lana tama. E \$300 le sala e totogi pe a faamaonia faavae o moliaga.

Se upega tafailagi mo pati a tamaiti

Ua ofoina atu nei se fesoasoani e talitonu e laveaiina ai amioga faaletaupulea a fanau a'oga pe a mafuta faatasi. Ua saunia nei se Lesitala i luga o le laina e faaaga e le aufaipati i Kalaiesetete e lagolagoina ai ni a latou tapenaga faapea. Ua lagolagoina foi e leoleo ma asosi a le auaoaga sea fuafuaga.

Patipatia e Manukau Toa o Aso Faisoo

Na faatumulia le Paka a Barry Curtis i Manukau i le Aso Toonai i sui o le aai, e patipatia faatasi le totoa o nisi o i latou i taimi e manaomia ai e se uso se lavea'i. Faaigoa o le Everyday Heroes, o le lona lua ai lea o tauaofiaga e taulamua ai leoleo a Manukau i lona faamaopoopoga.

Faafetaia se auuso i se galuega lavea'i

Na faailoa i se sauniga i le aai i Orewa le galuega lelei sa faia e le auuso Woodhouse o Owen 25 ma Laurence 27, i le laveaiina o ni tama a'oga se toalua a le Kolisi o Tagaloa ia Mati 2010. O Edward Magalogo ma Tua Alo na tafefea i le au ae na mafai ona faasaoina mai e i laua. Na maluu Edward ina ua le manuia togafiti e toe faaola ai.

Novopay ma faitioga e le uma

E le o mapu faitioga faasaga i le tautua a le Novopay. I se faaaliga o finagalo lata mai, e 72.7% o pulea'oga ua le o toe iai so latou faatua-tuaga i le Novopay. E faitau miliona na sasaa atu e le malo e faalelei ai ni faaletonu sa ta'ua, peitai o loo aliali mai pea le mau lape e le uma.

Gasolo a'e i ao o le lagi le NCEA

Po ua toetiiti lava au i ao a o lea ua aga'i atu nei i ai le tuligasi'a o ausiga manuia a fanau a'oga mo le tusipasi NCEA 2. O loo siitia pea le numera o fanau ua pasi le tusipasi numera 2, o se tala fiafia lea mo kolisi, le malo ma le matagaluega.

O mea i lugā!

A OU VAAI I OU LAGI: E iai mea e le oo i ai le vaai a le tagata a ua mafai ona iloa nei e ala i le fesoasoani a meavaai malosi. O le fetu lele o Kappa Cassiopeiae (tutotonu) e tusa ma le 2.5 miliona maila i le itula lona saosaoa. O lona saosaoa tele e mafua ai le lo'u mumu lena e mua'au i ona luma. O nei fetu e faapei o ni sau'ai

tamomo'e e avatua le ofo ma le mata'u tele i se aniva latou te laasia. E 400 piliona fetu i totonu o lo tatou aniva (Milky Way) ae sili ona tele paneta i lo fetu. E lagolagoina ai le mau faasaienisi e tele le avanoa e maua ai se isi ola poo ni ola e ese mai lo tatou lalolagi. O le ata na pu'e e le Kepler, o se satellite failipoti o loo i se itulagi e mamao mamao lava.

Folasia le fuafuaga a le Green

Ua tali atu le Pati o le Lanu Meamata i le malo i se fuafuaga e ave ai le faamuamua i a'oga e maulalo fuataga o tesile (low deciles). O a'oga nei e amata mai le 1 e aulia le 4. (Mo le silafia o le 1 e aupito maulalo).

I le vaiaso ua mavae na folasia ai e lona soata'ita'i, Metiria Turei, le fuafuaga a le Green mo a'oga a le atunuu pe afai e tu malo i le palota o loo loma nei.

E \$90 miliona ua fuafua e faatino ai ana fuafuaga mo a'oga tulagalua, o le tele o nei a'oga e i totonu o Aukilani i Saute ma isi vaega o le atunuu e iai Porirua i Ueligitone, atoa ni vaega o le taulaga o Kalaiesetete. O nei nofoaga e alaala ai le toatele o aiga Samoa ma uso a Pasefika.

I le fatu o lana fuafuaga ni taulaga tutotonu (hub) o gaoioiga e lagolago ai le fanau a'oga ma matua i o latou mana'oga.

Muamua o le itu i le ola maloloina, o se mea e manatu le Green o loo avea ma faalavelave i le a'oga a le fanau. I lana fuafuaga o le a faatofusia ai a'oga ma se tausima'i (nurse).

O le tasi faalavelave o le vaaiga o le fanau i itula e tuua ai le a'oga auā o loo galulue



Metiria Turei

matua i lea taimi. Ua folafola e le Green le sauni o sana faigamalo e ofoina sea tautua e aunoa ma se tau e totogi e matua. O le a fafaga fo'i e le malo tamaiti a'oga e aunoa se tau i matua.

E 20 ni Aoga Amata fou o le a fauina e faaalu ai se tinoitupe e \$25 miliona.

O nei taulaga (hubs) o le a vaaia e se tagata faigaluega o lona tiute o le soota'ia o auunaga e tautuaina mana'oga o fanau ma matua.

E taofi eseele le aufaitaofi, e aofia ai isi vaega faaupufai. Ua uma ona faailoa se taofi o le National e faapea e leai se mea fou i le fuafuaga a le Green; peita'i e manatu le Leipa o se fuafuaga na te lagolagoina. E le tauilo e telē le avanoa e galulue ai le Leipa ma le Green i se pulega soofaatasi pe afai e tula'i mai se tulaga faapea i le iuga o le faiga palota.

E le faigata ona tauilo le agaga o le fuafuaga a le Pati Meamata. E fesoota'i le a'oga a le fanau i le mole manava, atoa le apoia gofie e ma'i e mafua i le mativa.

Ae na tali mai Hekia Parata, o tautua uma ua folafola e le Green o loo faagaoioi nei e le malo. E 300 tausima'i o loo galulue, o le to'atele i a'oga tesile maulalo. Ua iai fo'i le aufaigaluega e lagolagoina fanau ma matua i faafitauli masani o fanau ma aiga.

Ua mae'a ona folasia le fuafuaga a le malo.

O le faasoa

gagana o se laau ola

Na maua se avanoa e talanoa ai ma se tasi uso Samoa i le eseese o tusiga o upu o la tatou gagana. A faitau atu i lea lomiga e ese, tilotilo ane i sea lautusi e ese; ma o lana mau, na o lana ekalesia o loo sa’o ai le faataotoga o le gagana tusitusi. Na ou fesili i ai pe aisea, ae fai mai na o latou o loo mulimuli tonu i le faataotoga a le Tusi Paia Samoa.

Na ou avea i ai se kopi o lenei puletini. Ona toe sau lea i le isi aso (o ia o se sui tala’i) ma fai mai, “O lena e feoloolo le tou pepa, a ua fai si papagu tele i faamamafa.” Ma toe tulitatao mai, “E iai upu na e sese o latou sipela.”

Ua laga i lenei talanoaga ma le uso se mataupu o loo afea fo’i i talanoaga ma taofi faaali o susuga i faia’oga i lenei vaitau. O iai le vaega o loo taasisia pea le ata a le Tusi Paia, faapitoa le lomiga teuteu o le 1969. Ae e iai fo’i isi ua mulita’ia ni faataotoga fou.

O iai ē taunapa i le sa’o o le tusiga ma lona vaeveaga (foliga i fafo), ae iai fo’i isi latou te ave le faataua i le na o le aano ma isi mea.

Ua faapipii le atikale ma se veape, atikale ma se suinauna poo se faailonauna, veape ma se soaveape, veape ma se motale . . .

E manatu isi e faigofie le taaofa’i e pei fo’i ona tupu i le gagana Peretania. O le ‘o’ nominata e tutasi lona tulaga i le faataotoga, faapei o se sa’o i lona tala na atoa; a o lea ua vaaia faatasi ma se atikale ua faapipii i ai i ni tusitusiga.

E tolu tusiga o le fuiupu faailotaimi nei o loo fa’aaoga nei i tusitusiga—‘o lo o’, ‘o loo’, ‘oloo’. O ai e fai mai e sese le tasi ae sa’o le isi!

O iai ‘nisi’ ma ‘ni isi’, ‘meanē’ ma ‘mea ane’, ‘avatu’ ma ‘ave atu’; o aga a upu e feusua’i ma fetāla’i—e pei o la tatou fo’i.

Pau o lea e taua i le fanau lo latou iloa o nei suiga. Pe puupuu pe tala’i le ta’uga poo le tusiga ae tasi lava le faataua.

E iai ni a’oga latou te le fa’aaogaina le koma faaleo ma le faamamafa, ae a faitau e tamaiti se tasi e leai se sasi. E ta’u mai, o le faitau lelei e faavae i le potua’oga, i le galuega a le faia’oga.

Ae aoga pea faailoga mo fanau laiti o loo tau faamasani i foliga ma leo o upu.

Ua faatusa le gagana i se laau ola. E tataua ona ola sa’oloto ina ia tupu ma faateleina ai lona malosi. Ae ao fo’i ona teuteu pea e fua i aga faavae (kalama) ua loa le taasisia.

O le mea fo’i lea na ou fausia ai le lapata’i a le uso sa ta’ua i luga e faataua i le sipela. O lea na ou aapa ane ai i le tasi a si toaina o Milner, ma maua ai le faasa’oga.

E ui i nai alosasi o iai, a o Milner o la tatou fua maua luga i le sipela tonu. E iloga lona amana’ia, auā o le tasi na sootuli sootau’au ai Samoa e lua i lona tuufaatasiga.

“mafauauga o le vaiaso”

Kalama! E oo i tupu e ao ai lana pule.
Moliere, o se fatuupu Farani o le 17 seneturi

Moli laau i Fogaa.
O le upu a Samoa

Ripoti

Faaauau tautua Ulimasao mo a’oga i gagana e lua

O le igoa Ulimasao ua lausilafia i le tala i le toa fafine o Nafanua ma ana ‘a’upega na tau ai le taua ma maua ai malo.

La lea o le igoa o se ‘a’upega ta’uta’ua i le tala faasolo o suegamalo a Samoa.

E leai se mau e faamaonia ai na toe tago’au Nafanua ma ia toe fa’aaoga le la’au. Atonu sa sili i le talitali o lona maota o se pine faamau o ana ausiga ta’uta’ua.

E le i mamao atu se taimi na ta’uta’u ai lenei igoa i Niu Sila nei i se faalapopotoga a faia’oga sa faaigoa ai.

I Aukilani na faavae ai le faalapopotoga o le igoa ULIMASAO, o lona sini faavae o le lagolagoina o iunite o Aoga i Gagana e Lua o loo faaaga ai le gagana Samoa. E to’atele susuga i faia’oga sa auai o ni sui. Alu a’i ua le toe faagaoioia ma sili fo’i i le talitali o le taimi e aulia mai lenei vaitau. Ua laasia nei se sefulu tausaga talu ina le toe sausuina le laau—a o lenei ua toe laga mai.

I se fuafuaga fou a le sa taiulu, o le a toe fa’aaauina ai lenei tautua.

I se talanoaga ma Patisepa Tuafuti na ia faaalia ai le mafuaaga o lea fuafuaga.

“O le taimi ua fetau, o le mea lea e taua.”

Faapea mai le faia’oga o le mafuaaga malosi na muta ai le tautua o le le lava o se taimi e faatino ai. Ina ua tula’i mai le Ulimasao o se talimana’o i a’oga ma faiaoga na ia iloa vave ai le le auga o le tali atu ae mea ane o loo galulue foi i faiva e ave i ai le faamuamua.

“O faiaoga uma e galulue i o latou faiva, e leai foi ni tagata faigaluega e faatinoina tiute e tataua mo se tautua lelei ma aveave pea.”

“E faalagolago le faalapopotoga i faiaoga ma o latou taimi avanoa. E le lava le na o le faaiuga o vaiaso e avatu ai se tautua atoatoa. O le faafitauli lena sa avea ma lave i le tali atu.”

Na ia faaupuina le taimi na le toe gaoioi ai le Ulimasao o se malologa. O se malologa sa sema se taimi talafeagai e toe soo ai le fau.

“Atonu o le taimi tonu lenei”, saunoa Tuafuti.

E toatele e fesiligia pea ia pe aisea ua le toe fa’aaauina ai le galuega, ma e toatele faia’oga ma pa’aga faalegaluega na pulunaunauina ia e toe faaauau le fe’au.

E aofia ai le alii faia’oga sinia o John McCaffery, o se tasi o sui o le faalapopotoga, o se ua lausilafia i lona sao i le tapenaina o faia’oga mo nei polokalame.



Saili Aukuso



Patisepa Tuafuti



Faimai Tuimauga

E toatele foi e manatu o loo gaoioi pea le Ulimasao, o nisi e fesoota’i mai fafo, ma ua saga silisili ai lona mafaua i le tataua ma le le tataua ona faaauau.

I le iuga ua malo le faaauau.

I le fuafuaga fou la ua faataoto, o le a faaauau ai pea sini faavae e pei ona taasisia mai i le uluai mafutaga. Peita’i o le a ave le taulaiga i le saga faamallosia o le ‘sootulau’ (o le faa-Samoa a Tuafuti i le Network) o taupulega ma sootaga ua iai.

Faapea mai Tuafuti, e fai o le faatu se iunite o leo e lua, ae e le faigofie lona faafailelega ma le faaualoaina. E mafua ai ona toe tapuni nisi polokalame ona o le vao faafitauli e mana’omia ai se lagolago faapitoa.

I le taimi muamua sa ave le faamuamua i mafutaga ma le auai mai. I le ata fou lenei o le a ave ai le faamuamua i le faatinoga—i se sao ‘anoa e ofoina atu. E avea ai le Ulimasao ma se ‘a’upega fesoasoani mo suiga, e lotolotoi i le li’o. O se sootulau saoloto o a’oga, matua, faiaoga, faalapopotoga ma soo se tasi lava e fia auai.

O nisi nei o ana tautua ofoina atu:

- Fesoasoani i le faavaeina o ni a’oga e faaaga ai le gagana Samoa;
- Fesoasoani e ala i fautuaga ma manatu;
- Fesoasoani i le faaolaolaina ma le tapu’eina o galuega tauamata.
- Fesoasoani i le galuega faafouina o faia’oga i agavaa moomia;
- Fesoasoani i le fausia ma faamautuina sootulau ina ia maua le malosi e ala i le soosootau’au ma le galulue faatasi.

Ua lagolagoina le susuga ia Tuafuti e tama’ita’i faia’oga ia Faimai Tuimauga ma Saili Aukuso i lenei fuafuaga faaauau.



SUI SA AUAI: Se vaega o susuga i faiaoga i Aukilani sa avea ma sui o le Ulimasao

E manatua Mulivai

Tusia e Saili Salā Lemalu

O Mulivai o le igoa lea o le isi fanua o lo matou aiga i gauta o le nuu. Pe a ma se tolu eka faatafafa lona tele. E tu auala ma e afe gofie e tagata. I le itu i sasae o loo ola lauusiusi ai le palautagitagi matou te tuaoi ai ma le isi aiga. O le itu i sisifo o loo tu ai faasolosolo se laina poumuli. O le tasi lea galuega a lo’u tamā sa fai e manatua ai. E seese lava i si ona falafala ma toto ina ua faato’ā tau faato’a le fanua. E iai i totonu le alia e pe i aso la ae a tetele timuga ona tafe tetele lea.

O le to’atele o tagata o le nuu ua tala atu i tuamaota ma faato’a nisi o latou eleele mo faatoaga ma aumau ai. O nisi aiga ua fausia ai o latou fale ma nonofo ma ola ai lava i latou.

O le fanua lenei sa matou galulue ai ma o matou matua a o matou laiti. Sa fai ai lo matou togakoko, o le isi itu o le maumaga, e fefiloi ma fa’i ma ‘ulu. O le isi vaega o le fanua sa fai ai le togatapa’a ma le togalaufala o lo’u tina.

E tele mea ou te manatua ai lenei fanua. Muamua, o le fasiielele na amata ai ona fofoa mafutaga mafanafana ma matua.

O le 16 o o’u tausaga a o le 14 lena o tausaga o si o’u uso o Fitu na amata ai ona matou galulue ma o’u matua i le galueaiina o meatoto. O matou uma lava ma si o’u tamā e galulue i le totoina o fa’i, ‘ulu ma talo. O isi aso ma te fesoasoani i lo ma tina i le velega o lona togātapaa. O le velega o le vaolima ma le mau’utoga e fai sina faigata, a o a ma fe’au na, e oo lava i le faiga o le lafo.

E na o Aso Toona’i lava matou te o uma ai ma o ma matua, auā o lea ua uma a’oga o le vaiaso. E ma te fā’atu pe a faapea mai lo’u tina e usupo la matou galuega.

“E manaia lava pe a ta loa le agelo a le Pope, ona tatou sauni loa lea manū o malu le taeao,” o si ona leo malu lea.

O le faailo lava lea ua matou masani ai pe a usu sa matou galuega. O le po e sauni ai o matou ofu faigaluega, o matou pulou mo le la, o tau atoato a si o’u tamā ma lana amo. O si o’u tina i sa matou fagupa’u vai, ma se oso o se suka, falaoamata, poo se alaisa fo’i mo lona tuagane o Teo ma le aiga. E faafesaga’i o matou fanua.

I nei mafutaga i le vao na vaai ai ma tilotilo i le tautiga o matua, ma oso ai le lagona alofa. O ni vaaiga e tu mai i le mafaufau e faamautu ai noataga mafanafana i le va ma matua e le toe galo.

O se nofoaga fo’i a manatua ona toe to manatu lea i lu’i o le olaga talavou o lenei ua aogā i le taumafai. Manatua fo’i o taimi



ua fai si matutua, ua musu e faapalapala atigilima, faaopoopo i ai ma le paie. O le toe fo’i i le aai o se avega mamafatu lea mo ma’ua auā foi e toe foi ma ni amoga meamata o ni fa’i, ‘ulu, talo, poo ni koko mata. O meamata nei e faasolosolo mo a matou mea’ai o le vaiaso. E fai la o le ma’ā o le auala, le mamafa o avega a o le vevela o le aso i le taimi e fo’i ai. E aumalosi si o’u uso laititi, e tetele lava ana avega na i lo a’u i le tele o taimi.

O le tala moni, e faamuamua ia te a’u lo’u faamanaia ona o le tele o taavale matou te fetaia’i i le ala. O la’u masani a ou faalogo atu loa ua uu mai se taavale o’u fai atu loa i si o’u uso: “Ta malolo ua fai si mamafa o a ta avega”, o sina faanoi lena e pupuni ai lagona faamanaia. Ua iloa lelei lava e si o’u uso le mea lea i lo’u mafaufau. Ae faamalosi mai ma faapea mai: “Ta tulitulia atu le a’ega o Ma’ā.” O le fanua lea o le isi aiga, e vaelua tonu ai le mamao o le ala. Mo a’u, a ta’u Mulivai ua ta’u le a’ega o Ma’ā auā o aso ia na pa ai tala i lo matou nuu i se teine aitu e masani ona iloa i le a’ega lea. Na faamatala ai foi le tuafafine o lo’u tamā ia te a’u i le mea na tupu ia te ia, ua atili ai lo’u talitonu. E oo atu loa le ma savaliga i ina te’i lava ua oso le maalili.

A ta’u foi le igoa o Mulivai ona toe manatua lea o sootaga mafana ma nai aiga ua mavae atu. Si tuagane o lo matou tina o Teo sa agalelei ane ia i matou i aso uma e o atu ai e galulue. E pei lava o loo ta vaai atu i le piiniu mai o sana faalifu taamu Niu Kini po o ni fa’i fo’i. O sina falai tumutumu maukeni e fai i le eleni, ae salani e le koko Samoa. Fa’i o le paie e vele talo, ae a tau loa le mafaufau i foliga o le faalifu a Teo ona faigofie lea o le savali i uta.

O le auala i uta e maua ai talanoaga ma isi fo’i o loo o e galulue, i tala i mea o loo tutupu i lo matou nuu. E oo atu le savaliga i Mulivai ua maua foi ma le ‘au o le paipa.

Nei ua ou matua, ou te manatua Mulivai o le eleele o faamanuiaga, auā na fofoa mai ai le olaga fatuaiga, le lagona alofa i matua ma aiga.

Ua faapei le ola lauusiusi o meatoto i lona eleele o le faatusa o mea lelei na ou a’oina, ma maua mai i na mafutaga i Mulivai.



MAMANU A LE STORM3D.COM



Copyright © storm3d.com 2014

O SE SOLO I LANU

Alefapeti o Lanu

A—Auro matau lelei mai, Ne’i e faapea o a’u o se samasama ae leai;

E—E lua lanu e amata ai: Efuefu le TV fou ae enaena le sukalati ou te le fiu ai;

U— Uliuli o se lanu e malosi, E le iloa se mea, se’i iloga e ki le moli o le potu.

M— E lima lanu: mumu, moana, meamata ma le moli; A malosi le mumu ona ta’u lea, o le mumu pauli;

Mumu le fu’a o Samoa; E iai ma le lanumoana e tatau ona e iloa; Moli e igoa ai foi le laau ma lona fua suamalie; A o le meamata e taatele e iloa gofie;

P—E lua lanu e amata ai: Piniki, pa’epa’e—o ni lanu e vaivai Pa’epa’e ua e mafaufau i le Aso Sa ma ou ofu mamā; Piniki le asikulimi, ae e le taugata.

S—Samasama ma le lanu siliva; Siliva le lanu o le taavale a le aiga; Samasama le ofu o le leoleo auala, E taofi taavale e soona saosaoa.

V—viole o se tasi lanu malosi, E lanu ai ni laau e seāseā maua. A galo ia te oe le alefapeti o lanu, Autilo loa i se nuanua i le lagi.

Ata i le anotusi: itulau 4 Tala faasolopito—Turnbull Library; ata o le maumaga itulau e tolu—elon.studioabroad.com; mamantu itulau e tolu—storm3d.com.
Solo: meatotino a le Evaleon books & resources

Sponsored by Evaleon Books

LOUTALA FA'ASOLOPITO SAMOA HISTORY

ASO FANAU TA'UTA'UA FEPUARI

Taisi Nelesoni,
24 Fepuari 1883Alesana Tuilagi,
24 Fepuari 1981Seilala Mapusua,
27 Fepuari 1980

24 Fep—02 Mati

24

1978 Tofia uluai amepasa a Samoa mo Amerika ma Malo
Aufaatasi: Maiava Iulai Toma

**Uluai Malaga vaa Polenisia
737 va o Faleolo—Aukilani**

1977 Faavae YMCA i Apia

1949 Faaali le fu'a a Samoa ua iai nei mo le taimi muamua

1928 Apia. 400 sui o le Mau taofia e leoleo a le malo

1883 Aso fanau Taisi Nelesoni

25

1930 Folafofa e Blake se vavao i sauaga faasaga i le Mau

26

2003 Ueligitone. Tauaao atu se talosaga i le palemene a Niu Sila e toe sui ai tulafono na faaleaogaina ai sitiseni Peretania o tagata Samoa

28

1963 Sefululima (15) le aofai o ulumatagaluega auina i Niu Sila mo le aoaoina i tomai faalegaluega

1944 Tuumalo Taisi Nelesoni i lona 61

1903 Faavae le Komiti o Fanua ma suafa e nafa ma tagi faatau atu i le malo

01 MATI

1949 Tofia Sir Guy Powles o le Komesina Sili a Niu Sila i Samoa

1938 Aso fanau Tui Atua Tupua Tamasese Efi

1900 Amata pulega a Siamani i motu i sisifo o Samoa

02

2001 Palota a Samoa, tu malo le HRPP, 28 sui

1994 Savali a Tumua ma Pule teena le VAGST



Na o le fa'aso e va ai le soifua mai o Taisi Nelesoni ma lona maliu i le masina e tasi. Na o le 60 ma le 1 tausaga ma ni aso se fa'aso soifuaga atoa. Ua iloga le suafa i le talafa'asolo o le malo fou o Samoa ma le finau mo le Tutoatasi.

Fanau i Safune i le 1883 i se tamā Suetena ma se tina Samoa, na tupu a'e i se siosiomaga o pisinisi ma avea ma pule sili o le kamupani o le igoa Nelesoni ina ua malolo lona tamā. Peita'i ua le o pisinisi a o le Mau ua pine ai lona sao i le atunuu. Amata mai i le 1926 ina ua naunau Samoa e fia auai fo'i i le pulega o le malo, na tula'i mai ai Taisi o se sui o le Mau. I ona tomai na vave ona avea ma se taitai i le finau a le Mau i le lotoifale ae fa'apea fo'i i fafo atu.

O le fa'asea a le malo Niu Sila ia Taisi e fa'apea o lo'o ia fa'aoloataua Samoa e fa'asaga tau i le malo. O le fa'avae lea o le fa'ai'uga a le fa'amasino o Luxford ia Mati 1934, ma ia fa'asala Taisi i le 8 masina i le toese ma fa'atafea mo tausaga e 10. I lona maliu i le 1944 na pine ai ni la'a iloga i luma i le finau a Samoa. 1945 na aloa'ia ai le iloiloga o le fanoga o Samoa ina ua sainia le maliega e fa'asoa teisi se vaega o le pule.

Malaga mai fo'i le palemia Niu Sila o Fraser e talanoaina le mataupu. 1946 ua avea ma mataupu a Malo Aufa'atasi. 1947 taunuu sui o Malo Aufa'atasi e talanoa atili. 1948 sili le fu'a a Samoa i Tiafau e faailo le ulua'i palemene faata'ita'i. O le isi vaega o le tala i le auala i le sa'olotoga ua silafia lava.

NIUPAC PUBLICATION

Email: evaleon@extra.co.nz
Phone: (09) 269-6186
Postal: PO Box 43122
Mangere Town Centre,
AUK 2153

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. NIUPAC 2014

Editors:

Levi Tavita
evaleon@extra.co.nz

Muliagatele Vāvāo Fetui
v.fetui@auckland.ac.nz

Saili Aukuso
saili.tavita@extra.co.nz

Sponsors:

New Zealand Lottery
Commission

Evaleon Books & Niupac
Publishing

Wheeler's Books (NZ)









EVALEON BOOKS & NIUPAC PUBLISHING

Telefoni (09) 269-6186. Imeli: evaleon@extra.co.nz



Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures. E tautua fo'i i le fa'aliliuga o gagana, ma le tapenaina o ni tusi e fia lomina i so'o se sionara o fatuga.



Lau Amata:
(i tusi e tolu)
2011, 2012
O se folasaga o vaegamea o le gagana, leo, upu ma uiga i sona aotelega. Fa'atasi ma galuega e su'esu'eina ai le fanau a'oga.



All our books are distributed by the University Bookshop Ltd,
Auckland City. Contact: www.ubsbooks.co.nz/
& Wheeler's Books NZ. Contact: www.wheelersbooks.co.nz

Ask for our Latest publications

UILI FAU UPU

Saili tali o fesili o lo'o i lalo.
Pule oe pe sipela i luma
(clockwise) po'o tua
(anticlockwise).
E sa le feosoosofa'i.



1. Tusi mai ni uiga se tolu
o le upu *fata* i le Igilisi:

2. Saili le upu (5mt) o lona
uiga o le *seagull* i le Igilisi

3. Su'e le upu *faatafa*, ma
tusi sona faamatalaga:

4. Tusi uma upu/ fuiupu
e ta'i 4-7 mata'itusi,
ma o latou soa i le
Igilisi (English).
(E faitaulia ma upu
ua ta'ua i le 1, 2 & 3)

Lelei atoa = 12 upu
Lelei tele = 8 upu
Lelei = 6 upu

SUDOKU #03 (TAALOGA I NUMERA)

						1	7	
		7	8	9	1		3	6
	4	3			9		2	
		8		5	6	7		
	6		1		3	8	4	
8	2		3	6	7	9		
	9	6						

© Sudokuessentials.com

Fa'atumu
pusa numera
(tama'i
sikuea) i
fuainumera
1 i le 9.
Ia uma ane le
galuega ua
maua atulaina
ta'itasi
(tu, fa'alava)
o iai le 1 i le 9.
E tofu le
atulaina ma
lona
fa'atulagaga
e ese mai le isi.

PASO SAMOA GAGANA E LUA

Fa'atumu le paso i upu Samoa. Fill the crossword
with Samoan words/names—unless stated otherwise.

1		2		3		4		5		6
						7				
8	9							10		
		11				12				13
14			15					16		
		17				18	19			
20					21				22	
				23						
24	25		26						27	
28			29							
	30								31	

Fa'alava~Across

1 Samoan
Rugby:
Patrick ? (7)



5 spade (3)
7 ant (3)
8 Samoan
Lifter: Ele ? (7)



10 any (2)
11 he (2)
12 Laos (3)
14 Abbr Joey (2)
15 Trad. call,
when bonito is caught (3,1)
16 wander (3)
18 a tree name (3)
20 sit (4)
22 gather, collect (2)
23 'Best' Education
NZ promoter (6)



24 Name, in
Bible (4)
27 a fish name (2)
28 borrow (2)
29 Accountant (7)
30 swim (3)
31 learn (2)

Lalo~Down

1 seize by force (3)
2 When? (3)
3 an old basket (coconut
leaf) (6)
4 Hymn: ____ le Alii! (1,5)
5 Samoan
Rugby;
Sinoti ? (6)



6 treasures (2)
9 crooked (3)
13 gorge, ravine
(4)
14 Black ferns:
Emma ? (6)
17 Where? (1,3)
19 cluster, bunch
(6)
21 Black ferns:
Justine ? (5)



22 affected (5)
25 even number
(3)
26 Sing a song
(3)



TA'U MAI LE IGOA
MA LE NUU E IAI LE
FALESA LENEI
I SAMOA.
FAAMATALA ATILI.



TALI GALUEGA

UILI FAU'UPU 01

1. maa—stone; maa—
headstone; ma'a—battery
2. faamalo—tu pei se
fitafta
3. faamalo (veape, nauna,
soanauna). Fai atu le upu
Malo! i se isi e faafeiloai pe
faafetaia se fe'au/ausiga
lelei ua faia. "E avatu le
faamalo ia te outou sa fai
ma sui o le tatou a'oga.
Malo le faamalosi!"
4. malo—congratulations;

malo—guests; malo—
solid; fola—deck; fola—
to spread out; alofa—
love; lama—to lay
ambush; faama—to
shame; faamalo—be rigid;
faamalo—to congratulate

TALI SUDOKU #02

1	5	6	3	9	2	7	4	8
4	2	3	8	7	5	6	9	1
8	7	9	6	4	1	3	2	5
7	9	1	4	8	6	5	3	2
2	3	8	1	5	9	4	7	6
5	6	4	2	3	7	1	8	9
9	4	5	7	1	8	2	6	3
3	8	2	5	6	4	9	1	7
6	1	7	9	2	3	8	5	4

TA'U MAI:

I le nuu o
Taga i
Savaii e iai
le vaaiga lenesi; faaigoa o le
Alofaaga poo le Pupū i
Taga.



TALI PASO # 02

S	T	O	W	E	R	S	L	I	O
A	S	M	A	S	A	E			
A	F	I	O	A	G	A	U	A	
U	A	M	S	E	A	L			
M	A	K	K	A	K	A	I		
A	E	K	E	I	A	T	I	L	
U	I	T	O	A	M	U	A		
T	U	A	A	A	A	K	A	T	O
A	E	M	A	N	U	K	A	U	
A	L	O	E	I					

© PasoSamoa, 2014

POLE ma PAPA

